



ELECZIUN DA PROFESSION – TIPS PER GENITURS

Il process da l'elecziun da professiun è in viadi fitg interessant per Voss uffant. Sco geniturs essas Vus la persuna la pli impurtanta en quest process.

Guardai che Voss uffant rimnia tut ils documents da l'elecziun da professiun en in ordinatur. Intginas scolas dovran in ordinatur aposte per l'elecziun da professiun, sco per exemplu l'ordinatur «profilo». Sin la pagina d'internet da la cussegliazion professiunala stattan a disposizion insaquants documents per quel ordinatur e per ils singuls pass da l'elecziun da professiun: www.berufsbildung.gr.ch → Rumantsch → Documentaziun → cussegliazion da clamada, studis e carriera → «profilo».

A quest fegl d'infurmaziun vegni renvià sin tscherts documents cun il segn ►.

 La preparaziun da l'elecziun da professiun cumenza per regla davent da la seconda classa superiura u per part era gia a la fin da l'emprima classa superiura. L'urari da l'elecziun da professiun dat ina buna orientaziun sur dals pass necessaris. Planisai ils pass da l'elecziun da professiun ensemen cun Voss uffant e discurri cun las persunas d'instrucziun pertutgant la preparaziun da l'elecziun da professiun en scola.

► **urari da l'elecziun da professiun**

En quai che suonda chattais Vus intginas infurmaziuns e cussegls per ils pass impurtants dal process da l'elecziun da professiun.

1. pass: Empreender d'enconuscher sasez – interess e fermezzas

 En in emprim pass explorescha Voss uffant ses interess e sias abilitads. Sustegnai Voss uffant en quest process. Tschertgai la discussiun cun el e dai ad el in resun davart sias abilitads e fermezzas. Vus pudais tschenttar dumondas, far discurs sur da l'avegnir en scola u professiunal e dar impuls. Igl è impurtant che Voss uffant sentia che Vus avais in'ureglia averta per sias ideas e sias dumondas.

► **valitaziun tras auters e valitaziun da sasez**

2. pass: Empreender d'enconuscher la vita professiunala

 En in segund pass duai Voss uffant scuvrir professiuns che l'interessan. Gidai Voss uffant ad empreender d'enconuscher ils cuntegns da sias professiuns preferidas. Infurmaziuns e films davart las professiuns chattais Vus sut www.berufsberatung.ch. La tschertga d'infurmaziuns na duai betg sa restrenschier mo sin l'internet. Vossas atgnas experientschas professiunala, e quellas da parents e d'enconuschents pon dar buns impuls a Voss uffant. Visitai communablaman il CIP (Center d'infurmaziun professiunala) u occurrenzas d'infurmaziun, nua ch'ils giuvenils survegnan ina buna invista da manaschis e professiuns. Era exposiziuns da professiuns, sco p.ex. FIUTSCHER, dattan ina invista dal mund multifar da las professiuns.

Il sistem da formaziun cumpiglia numerusas vias. Oz na datti betg pli «la professiun da la vita». Il svilup da l'economia e da la tecnica porscha e pretenda cintinuadament novas cumpetenças. Ma er ils interess e las abilitads da mintga singula persuna pon sa midar en il decurs dal temp. Per quest motiv vegni er discurri da l'emprima elecziun da professiun.

► **sistem da formaziun**

► **formaziun professiunala da basa**

► **maturidad professiunala durant l'emprendissadi MP 1**

► **scola media spezialisada, gimnasi, scola media commerziala, scola media d'informatica**



3. pass: Cumpareglier interess e fermezzas cun pretensiuns da las professiuns

En in terz pass reunescha Voss uffant ils resultats dals dus emprims pass. El cumpareglia las atgnas fermezzas ed ils agens interess cun las pretensiuns da las professiuns che l'interessan. Vus pudais sustegnair Voss uffant durant quest process.

- **Pretensiuns - Tge cumpetenzas dovras ti per tes mastergn da siemi?**



4. pass: Intercurir intensivamain professiuns interessantas – fufragnadi

En in quart pass duai Voss uffant ir a far fufragnadis. Fufragnar è ina impurtanta experientscha el process da clamada. Fufragnar fa senn, cura che Voss uffant prenda ina u pliras professiuns pli detagliadaman en mira. Sustegni Voss uffant cun buns cusseglis. Surlaschai dentant la tschertga e l'organisaziun dal fufragnadi a Voss uffant. Vus retschavais adressas dals manaschis d'emprendissadi en Vossa regiun sut www.berufsberatung.ch/schnupperadressen u tras la «BIZ App» (per telechargiar en l'App Store). Diaris da fufragnadi pon ins retrair tar la cussegliazion professiunala.

► **il fufragnadi**

► **pass da fufragnadi**

► **fufragnadi: mes diari**



5. pass: Examinar e decider

En in tschintgavel pass decidan ils juuenils en tge direcziun che lur via professiunala maina. Quai po esser ina furmaziun professiunala u ina scola media. Discutai cun Voss uffant sur da sia decisiun. Prendai serius ses criteris e ses arguments e manai ina discussiun constructiva. Voss uffant duai examinar plis mastergns d'emprendissadi precisamain per pudair elavurar alternativas tar ses mastergn da siemi.

► **rangaziun da las professiuns**



6. pass: Realisar – tschertgar emprendissadi u s'annunziar per ina scola media

En in sisavel pass va Voss uffant sin la tschertga d'in lieu d'emprendissadi u sa prepara per l'examen d'ina scola media. L'avust da la terza classa superiura vegnan las pazzas libras d'emprendissadi publitgadas sin www.berufsberatung.ch per l'onn suendant. As infurmai tge che tutga tar il dossier d'annunzia e co ins po crear in tal. Vus pudais curreger ils documents da Voss uffants, l'annunzia duess l'uffant dentant scriver sez. Intgins manaschis d'emprendissadi pretendan che l'uffant absolvì in test da qualificaziun. Latiers exista different material d'exercitar. Gidai er Voss uffant a sa preparar u exercitar discurs da preschentaziun. L'ultim termin d'annunzia per ina scola media è mintgamai il schaner da la segunda u da la terza classa superiura. Ils juuenils vegnan adina puspè confruntads cun success u disditga. Uschia è il sustegn davart Vus geniturs durant quest temp dad immensa impurtanza.

► **tests da qualificaziun**

► **soluziuns transitoricas**

► **tips per il curs da la vita**

► **tips per la brev d'annunzia**

► **tips per il discurs da preschentaziun**

► **tips per la tschertga da pazzas d'emprendissadi**

► **tips per s'annunziar per pazzas d'emprendissadi**

► **survista da las annunzias per ina plaza d'emprendissadi**



7. pass: Sa preparar sin l'emprendissadi u sin scolas medias

Il process da clamada na termingescha cun suttascriver il contract d'emprendissadi, ubain cun reussir a l'examen per ina scola media. Quai è tema en il 7. pass. Per Voss uffant e la midada en la vita professiunala in grond pass. Discutai cun el sur da las midadas che stattan avant porta.

► **tips per la preparaziun d'exams**

► **preparaziun sin l'emprendissadi u sin scola cuntuanta**

► **propostas d'abitar per scolaras e scolars, emprendists e students**

CIP Grischun

Cussegliadras e cussegliaders da professiun sustegnan gugent Voss uffant tar l'elecziun da professiun u tar l'elecziun d'ina scola. Els gidan dad eruir las fermezzas ed ils interess, mo era tar la tschertga dad ideas professiunalas. Sch'igl è necessari, pon els utilisar tests u meds da lavur. Els sustegnan era tar la tschertga d'in lieu d'emprendissadi e gidan da scriver in'annunzia.

www.berufsbildung.gr.ch; biz@afb.gr.ch